

中國方志叢書·華中地方·第五六四號

據

明·耿宗道等纂修
明嘉靖年間修，民國三年刊印本

影印

浙江省

臨山衛志

成文出版社有限公司印行

中華民國七十二年三月臺一版

臨山衛志 全一冊

發行人：黃 成 助

出版者：成文出版社有限公司

台北郵政信箱二二六〇五號

台北郵政信箱二二六〇五號

台北市杭州南路一段6巷9號3F

印刷者：上林彩色印刷有限公司

電話：三九一六四一六〇（五線）
台北市大理街 145 號

新聞局出版登記證：局版台業字第一一四三號

本志原書係中央研究院歷史語言研究所所藏

並承惠借 謹此致謝！

臨人樂也

中華民國三年
仲春之月付刊

自城鎮鄉之制起吾姚城區而外共分四十三鄉西
門鄉而西爲湖地鄉湖地鄉而西爲臨山鄉顧臨山
旣以鄉名而何以倚山傍林高墉屹屹乎曰是固昔
日之衛城也按臨山之設衛在有明初葉其城爲大
將軍湯公所手築蓋以姚地北濱大海恐海氛之不
靖於是建成設官以鎮守之當夫成弘之際海宇澄
泰烽堠不煙其時有賈指揮李指揮諸使君於訓練
之暇與我家太傅及馮憲副諸鉅公詩酒往還更唱
迭和濡筆一揮湖山增色瀟然有祭征虜雅歌投壺
氣象丹鳳飛來止福田朝陽春樹萬峯連載在我家
蕉軒先生東山志者猶可得其片羽奈自巡檢移設

於此而制一更自巡檢廢而改爲鄉而制又一大更
至今問巡署未移以前事其知者幾人則自今以往
問未改鄉以前事其噤口而莫答者固亦事勢之所
必然也夫丈夫志在四方當務其大者遠者國勢之
孱弱將何以振起之民生之彫敝將何以補救之實
業之未興將何以提倡之外交之未洽將何以輯睦
之況今民國初基內憂外患迄未甯謐正志士奮袂
而起共盡天職之秋舍此不事而徒學賈李之從事
吟壇陋哉陋哉蓋末技耳則刻劃風雲描摹月露之
佳篇卽與月露風雲以俱杳亦何足深憾顧此不足
深憾至并當時之所以固國防奠民居與夫變遷之

大局籌濟之宏規而亦等諸月露風雲無從追索烏
乎可哉是志爲明耿把總所訂述當時之制度綦詳
湖地戚君得之於叢殘之餘臨山諸君壽之於按羅
之後使乎世之學者得以由後而溯乎先卽物而窮
其故知當時之防患若是其預當時之立制若是其
周同時建設一千八百所而民何以不覺其擾費何
以不覺其困後世繼承二百數十載而餉何以不至
於中蹶令何以不至於頻更是必有道以處此而推
而究之擴而充之日求乎大者遠者之學則所持以
相餉者不且有溢於簡帙之外者哉若僅以爲保存
古蹟則淺之矣

中華民國三年四月之吉同邑四門鄉謝葆濂識

臨山衛志凡例

一臨山三山瀝海舊無志也今惟稽獻言訪之耆碩
閱記載註意采輯取其的然可言者志之但事實
有考則詳無徵則略或有未盡者後之君子可據
此以加筆削也

一建置分野山川形勝與夫城濠廟祀軍營水利器
械船隻之類書之不敢遺漏

一我朝設立總兵參將都指揮統轄軍職凡駐節本
衛者一一具載姓名或有功德爲人仰誦者必志
其文以彰其賢如見存而未經去任者人多避嫌
不書愚獨直據其實而書之恐濱海文獻莫考久

或堙其實也

一忠孝節義善行隱逸科貢武舉治功戰功不敢紊志必分門析類各小引於其首以載之也

一文章詩句關衛所之大政者錄之工拙初不甚計也私家之文雖工亦略之

一災異有考必書無稽之言不敢妄載

臨山衛志凡例終

臨山衛志目錄

卷之一

建置	分野	城濠	形勝	疆域	山川
風俗	公署	職官	經歷	知事	吏胥
職事	武臣	軍額	軍營	軍器	軍需

卷之二

典制附印信銅牌
書籍誥命

禮儀禳儀 郵鋪

關隘	廟祀	水利	馬路	地隴	濠塹
臺堠	橋梁	海堤	潮汐	紀異	戰船

卷之三

忠孝	節義	善行	隱逸	治功	戰功
----	----	----	----	----	----

科貢 生儒 武舉 例宦 牌坊

卷之四

古蹟 義塚 物產 文藝

臨山衛志目錄終

臨山衛志卷之一

欽差分守浙江甯紹等處地方參將朱冠采輯

欽差把總臨觀以都指揮體統行事耿宗道采輯

本衛軍政掌印兼管局指揮僉事馬斌采輯

慈溪縣學生員張訓撰次

紹興府學生員謝鐵撰次

慈溪縣學生員陳原中校正

建置

上古文武一途立法至精大備於是百蠻率俾中國
又安天下稱盛治焉自秦易封建爲郡縣於是漢唐
以來置南北軍設十六衛而文武兵農分爲二矣我

朝酌古準今既設郡縣而復於要害之地設置衛所參錯其閒彼此相維文武並用真得上古之遺意爲昭代之良法也

本衛

衛坐餘姚縣東山三里三都唐虞時屬揚州之域夏少康世國號於越餘姚在其封內戰國以來秦置越地爲會稽郡遂爲領縣衛初未之設也洪武二十年信國公湯和議於餘姚上虞之西北建置衛所巡司以備日本遂徙上虞故嵩城於東山三都爲臨山衛初調南北各省軍守繼抽台溫等處民四分之一以充行伍內領左右中前後五千戶所外轄三山瀝海

二守禦千戶所並隸浙江都指揮使司

三山所

去衛治東六十里坐餘姚縣一都梅川鄉昔虞世南築居於此號虞家城洪武二十年信國公命千戶劉巧住築於三山所而領十百戶焉

瀝海所

去衛所六十里坐會稽縣三十三都洪武二十四年信國公建城爲瀝海所亦領十百戶焉

分野

志之體郡紀星分邑紀山川衛之分野固揚州會稽之封域也故亦不敢略焉然分星肇於軒轅繼職於

周官保章雜出於歷代史臣及爾雅諸傳記其閒亦不能無異同者然法在必書亦不必泥必曰某土起某度某星主某事應不免陷於左氏傳會之誤矣亦固矣哉又先正云近臣志郡邑者多擬漢書以天文爲首夫以一郡邑之小遽欲效一代之制無乃模倣之過乎誠哉斯言也識之擇之會稽禹貢揚州之域位當少陽星入牽牛上應天市東垣六星今衛在會稽餘姚之封域中焉

城濠

周官掌固以掌王畿之固司險以司天下之險蓋城池之立所以捍衛生靈乃有國者之不廢而至於衛